

ORASSIÒN

Grassie Signor... grassie...

de averme assà dormìr par qualche ora
e de assàr che me sveia stamatina,
anca se tormentà da mile spine.

Grassie... par ci m'è morto ma g'ò 'vudo
quanto è bastà a lassarme un bon ricordo,
e più ancora par ci m'è restà intorno
a darne e tórme amor e compagnia.

Grassie par non averghe fato torto
a nissuno, savéndoghe de farlo...
par avèr pardonà ci me n'à fato
sradisando la pianta del rancór.

Grassie pa'l sol, pa'i albari, pa'i fiori,
par tute le creature de 'sto mondo...
par 'vérme dà du oci par vardarli
coi ociài grandi de la poesia.

E grassie par l'incanto de la musica
che traverso le rece, pocià in l'anima
da'l spassio e'l tempo la me porta a Ti.

Grassie... po' grassie
sora a tuto parché, Signor,

mi sò che Te ghe si!

ORASSIÒN

Grassie, Signor,
pa' stò silensio scuro
che me respira intorno
un fià caldo de vita
e dolçemente
involtolandome tuta
co' 'na teraina de sogni
el me compagna al sòno
ninàndome a piàn.

Grassie, Signor,
ancò l'è stà giorno de festa,
dorme ci me sà caro,
la me casa l'è in paçe.
Anca l'useléto
l'à piegà-zò la testa
soto l'ala de sèda
e'l se insogna
albari alti
spiansàdi de sol!

Grassie...
par l'ultimo geranio
che g'à 'vù el coràio de nàssar
ai primi fredì de inverno
e che 'dèssò, anca lù,
el dorme co'l coresin strucado
nel sò vaso de quarèl.

Grassie, Signor,

Par l'amor che ancò te m'è dado,
pa'l dolor che no' g'ò 'vudo,
par l'amiga speranza
che come ogni altra note
m'à rincalsà le coèrte
e me carèssa con déi de stele i oci
infin che i sèro.

A NOTTE

A notte
quando si riunisce il firmamento
tra gli infiniti mondi
ti cerco, Signore.

Rivolgi a me la tua faccia
aguzza il tuo sguardo
tocca il mio essere
vieni a dissipare ogni timore
ogni errore.

Mostrami
nel labirinto di menzognere luci
la lampada che arde inesausta
sulla Tua porta.